



## Inatsisartut

*Aningaasaqarnermut Ataatsimiititaliaq  
Finansudvalget*

Ulloq/Dato: 17. december 2009  
J.nr.: 01.31.06/09-00453

### Aningaasaqarnermut Naalakkersuisoq

**Aningaasaqarnermut Ataatsimiititaliap suliaq nr. 01.31.06/09-00453 pillugu pingasunngornermi ulloq 16. december 2009-mi aalajangiineranik Naalakkersuisunut ilisimatitsineq.**

**Kotomut pingaarnermut 20.11.72-imut, Nunaqarfinni illoqarfinnilu aalajangersimasuni 16-ini immikkut suliniutinut aamma pilersitsiniarnernut sillimmatinut tunngasumi, oqaasertaliussinissamik qinnuteqaat**

#### **Naalakkersuisut inassutigaa,**

- Oqaasertaliussaqa aamma oqaasertaliussamut nassuiaat ilanngunneqartut 2009-mi ilassutitut aningaasaliissutinut inatsimmi ilanngunneqarnissaasa akuerineqarnissaat qinnutigineqassasoq,
- Naalakkersuisut piginnaatinneqassasut ukiumut aningaasaliissutit saniatigut sillimmatitut immikkoortitat amerlaqataannik aningaasartuuteqarnissamut
- 20.11.72-imut, nunaqarfinni illoqarfinnilu immikkut suliniutinut 2009-mi aningaasaliissutinut tunngasumut, oqaasertaliussaqa oqaasertaliussamullu nassuiaat akuerineqassasut.

#### **Aningaasaqarnermut Ataatsimiititaliap oqaaseqaatai**

Nunaqarfinnut sillimmatit atorneqanngitsut 2010-mi atugassanngorlugit immikkoortinneqarnissaannut Naalakkersuisunut piginnaatitsisumik oqaasertaliussisoqarnissaa suliama matumani Naalakkersuisut qinnutigaa.

Tamanna Aningaasaqarnermut Ataatsimiititaliamit akuerineqarsinnaavoq, tamatumani ataatsimiititaliamit maluginiarneqarluni – aalajangiisuutinneqarlunilu – qinnuteqaatip Missingersuusiornernut inatsimmi aalajangersakkanut tamakkiisumik naapertuuttut Naalakkersuisunit nalilerneqarnera.

Nunaqarfiit illoqarfiillu taaneqartut 16-it naatsorsuutigineqartut annertutigisumik qinnuteqarsimanginnerat nunaqarfinnut sillimmatit atorneqarsimanginnerannut ilaatigut pissutaatinneqartoq ataatsimiititaliap maluginiarpaa. Akerlianik nunaqarfiit aaqqissuussinermut ilaatinneqanngitsut suliniutissatut siunnersuutinut saqqummiussisimaneraneqarput. Aaqqissuussinermi siunertarineqartup annertusineqarnissaanut tamanna tunngavissiisoq Aningaasaqarnermut Ataatsimiititaliaq isumaqarpoq, taamaallunilu illoqarfiit nunaqarfiillu 16-it taaneqartut saniatigut nunaqarfinni illoqarfinnilu allani suliniutit naleqquttut aaqqissuussinermut ilanngunneqarsinnaaqqullugit.

Paasissutissiissutigineqartut malillugit nunaqarfinnut sillimmatinit 11,8 mio. kr.-it atorneqarsimapput. Taakkunanit 575.000 kr.-it ilinniarnissamik neqerooruteqarnermut atorneqarput. Aningaasat atorneqartut sinneri Royal Greenlandip Arctic Green Foodillu nunaqarfinni tunisassiorfiisa ingerlanneqarneranni sullissinissamik isumaqatigiissutinut

atorneqarsimapput. Ilinniartitseqqinnissaq ilinniartitaanikkullu suliniuteqarnissaq siunertaralugit aningaasat annertunerusumik atorneqartariaqartut Aningaasaqarnermut Ataatsimiititaliaq isumaqarpoq. Tamanna eqqumaffigniaqqullugu Naalakkersuisut ataatsimiititaliamit kaammattorneqarput.

Tamatuma saniatigut tunitsivinnut sullissinissamik isumaqatigiissutinut akiliutit ataavartumik tapiissutinngornissaat qanoq pinngitsoorneqarsinnaanersoq sukumiisumik isumaliutigineqartariaqartoq Aningaasaqarnermut Ataatsimiititaliaq isumaqarpoq. Pisortat sullissinissamik isumaqatigiissutinut akiliutaat ingerlaavartumik ikilisikkiartuaarnissaat Naalakkersuisut annertunerusumik suliniutigisariaqarpaat. Taamaalillunilu tunngaviusumik isigalugu tapiissutit *utaqqiisaaginnartumik* atuuttussatut tunniunneqartariaqarput.

Qinnuteqaat taanna ulloq 26. november 2009-mili Naalakkersuisunit akuerineqartoq Aningaasaqarnermut Ataatsimiititaliap paasivaa. Suliassarli ulloq 10. november 2009-mi Aningaasaqarnermut Ataatsimiititaliamut aatsaat nassiunneqarpoq. Taamatut kinguaattooruteqarnerup naapertuutinnginnera eqqaassanngikkaanni qinnuteqaatip eqqortumik takutitsiunnaarnera tamatuma kinguneraa. Taamaalilluni nunaqarfinnut immikkoortumut pilersaarummik misissueqqaarnissamut aningaasanik qinnuteqarnissaq Inuussutissarsiornermut Naalakkersuisoqarfiup (ISN) isumaliutigigaa oqaatigineqarpoq. Tamanna maannangaaq qulaajarneqareersimasariaqarpoq, tamatumalu kingorna qinnuteqaat iluarsineqarluni.

Tamatuma saniatigut nunaqarfinnut immikkoortumut pilersaarutip maannamut suliarineqarnerata killiffia piffissallu qanoq ilinerani suut ingerlanneqarsimanerannut nassuiaat Aningaasaqarnermut Ataatsimiititaliamit qinnutigineqassaaq. Nunaqarfinnut immikkoortumut pilersaarutip suliarineqarnerani piffissap qanoq ilinerani suut pingaarnertut ingerlanneqarsimansut tassani allassimassasoq kissaatigineqarpoq. Tamatuma saniatigut suliap naammassineqarnissaanut pisussat piffissaliussallu pingaarnertut paasissutissiissutigineqarnissaat kissaatigineqarpoq. Kiisalu pilersaarummi pingaarnertut annertussusiliinerit anguniakkallu nassuiaatigineqarnissaat kissaatigineqarpoq.

Kiisalu ataatsimiititaliap isummernissaanut tunngavissiaq nalinginnaasumik kukkunersiorneqarluarsimasinnaagaluartoq ataatsimiititaliamit oqaatigineqassaaq.

### **Aningaasaqarnermut Ataatsimiititaliap aalajangiinera**

Siuliani allassimasut piumasaqaatigalugit tunngavissaatillugillu Naalakkersuisut inassuteqaataat Aningaasaqarnermut Ataatsimiititaliamit **akuerineqarput**. Oqaaseqaatinut siuliani allassimasunut Naalakkersuisut akissutaat kalaallisut danskisullu kingusinnerpaamik ulloq 9. januar 2010-mi nassiunneqassasoq qinnutigineqarpoq nuutinneralu qarasaasiakkut uunga nassiunneqarluni: [nch@inatsisartut.gl](mailto:nch@inatsisartut.gl).

Aningaasaqarnermut Ataatsimiititaliaq sinnerlugu

Naaja Nathanielsen

Aningaasaqarnermut Ataatsimiititaliap siulittaasua